

Stručnjaci OHR-a i haškog Tribunala započeli razgovore o obimu aktivnosti procesuiranja ratnih zločina u Bosni i Hercegovini

Viši zamjenik Visokog predstavnika i šef Ogranka za vladavinu prava, Bernard Fassier, i predsjednik Međunarodnog tribunala za zločine počinjene na teritoriji bivše Jugoslavije, sudija Claude Jorda, su danas otvorili stručnu konferenciju na kojoj sudjeluju eksperti iz ove oblasti. Sudionici konferencije će se baviti pitanjima koja je potrebno rješavati kako bi se u Bosni i Hercegovini omogućilo efikasno procesuiranje onih ratnih zločina koje neće procesuirati haški Tribunal.

Ova konferencija će međunarodnoj zajednici pružiti mogućnost da ostvari bolje razumijevanje tehničkih uslova ovog procesa, uključujući i broj predmeta koje će biti potrebno razmotriti, broj sudova koje će biti potrebno angažirati u ovom procesu, kao i financijska opterećenja koja proizilaze iz razvijanja ovakvih kapaciteta u Bosni i Hercegovini.

Predstavnici Tribunala i OHR-a će zajednički procijeniti parametre i obim ovih aktivnosti, predmete koje treba razmotriti, troškove, nivo međunarodnog angažmana i potrebna prilagođavanja bh. pravnog okvira.

Ova trodnevna radna konferencija predstavlja zadnju konferenciju ove vrste u nizu sastanaka koji su o ovoj temi održani između predstavnika OHR-a i Tribunala. Visoki predstavnik se u novembru 2002. godine u Sarajevu sastao sa glavnom tužiteljicom Tribunala, gospođom Carlom Del Ponte, a u decembru 2002. godine u Hagu sa predsjednikom Tribunala,

sudijom Claude Jordom.

Preliminarni zaključci ove radne konferencije biti će upućeni Upravnom odboru Vijeća za implementaciju mira koji će 30. januara 2003. godine održati svoju sjednicu na nivou političkih direktora.

Prvog dana konferencije sudionici će razgovarati o mogućem broju i prirodi predmeta koji će se rješavati u Bosni i Hercegovini, te o najnovijim izmjenama Krivičnog zakona i Zakona o krivičnom postupku u BiH.